

Aesea

Ahi vise Aesea vamai vahi provet tai onen

Aesea 6:1-10

6 ¹En sua koa asuv houlu Usaea ten out Sudah mat,^a inau, Aesea, nales Iahova mul rondan en vulin ten keihoen koa mul vina nesa. Kot koa musin eni tetaveah, ka ngolite vita netan sien out neim en Eim Votut onen. ²En out koa Iahova mul ien, vati angelo keil koa avise en ‘sereb’ amuka nesa eni ka ave mul vihil houlu. Retai en keil, apoue ahetai (6). En apoue elu, akav koe nae eni; ka en elu mun, akav koe ale tanetan eni; ka en elu mun, amuka eni. ³Ka navong amuka, avisohiso va min keil eris avit,

“!Votut, votut, votut! !Iahova, Asuv Houlu ten out nesa, vi votut!^b
Keihoen onen mariso ka sien out netan.”

⁴Hisoen keil one keih ka sakini eim enek kulul, ka neim en Eim Votut vilelau en eas.^c ⁵Navong nalesi, nametau houlu ka naviteni navit, “!Aue li, mamat ke! Selusien vasi keil koa akistal ran ongok romutotei, ka naro luhu en meatin keil koa selusien one mun romutotei en meten Ahi. Anatin eli, navilehilo ka nales Iahova, Asuv Houlu ten out nesa, en metok kati.”

⁶Evus, sereb tai va en ahor koa amunit senta ien, kaeat kat ahat tai koa mukan vilhili rani, ka kuri mai venau. ⁷Navong mai, rokol ongok en ahat koa mukan vilhili ka viteni vit, “?Kolesi? Navong narokol ongom en ahat koa mukan vilhili ekek, Ahi sak motein moulien onom ran tisaen keil onom ka sakinuk kirmemoutei mun veni.”

⁸Evus, naraengon Iahova selus vit, “?Nisila sei? ?Isei hehi provet onomai?”

Sakini naviteni navit, “!Inau ke! !Sila nau!”

⁹Sakini, kei viteni minau vit, “Kiha kihiteni min meatin keil ekek kihit, ‘Avaseini mihetaeng heha vis ...

kami miherlong kilea etai tounah.

^a 6:1 Asuv houlu Usaea mat vesesal en sua 740 BC (sua keil mulamu en avong koa Iesu avasi). ^b 6:3 Rev 4:8 ^c 6:4 Eks 40:34-35; Rev 15:8

Avaseini mihelele heha vis ...
miherlei kilea etai tounah.’

- 10 Selusien onom hesakin vatin meatin keil ekek hemai hekeih imok,
houmon ralinge hehon ka mete hevar.
Veni munak ilei revi en tounah koa numoni en mete,
vuo ilong kilea eni en ralinge,
keil indem revi ka ihiles ran tisaen keil one
ka nimai nikulat mesaien ran moulien one.”

Iahova vat kati keke hesan ehon tai vakataun meatin keil onen

Aesea 7:10-14; 9:6-7

7 10 En avong tai, provet Aesea va les asuv houlu Ehas ka vit mesein selusien onen Iahova mini vit, 11 “Munak em vati kovakur anatin en selusien onen Iahova koa vi Ahi onom, kihisi hetie lat tounah tai minuk. Avaseini munak kovisi keke hemai hekistal ran out ten matien en huinev ten atan, vuo ran out nesa, vuo ran out sav koa mul luhu en keilu.”

12 Ka asuv houlu Ehas viteni mini vit, “Vuo, inau nirvis etai tounah rani, veni ek rovattei masak vis Iahova.”

13 Sakini, provet Aesea viteni mini vit, “!Keik ka kami koa mikistal ran vatiamal onen asuv houlu **Deved**, mihetaeng revi! Veni vatumi keih, lisenges mimumon provet keil onen Iahova ave mah en selusien. ?Ka mukave? ?Emi vati mivoumon Iahova mun aven vamah en kami? 14 Ekek, Iahova keinges hetie lat tounah hehi metai tai minuk keke kilesi. Atouli hau tai hemeas en titiali ka navong hekuri hehi ehon tai, ka heling isen ‘Imanuel’ koa aneite teni vi, ‘Ahi ro ral min ir.’ ”^d

9 6 “Anatin, tivava tai, ihasi ven ir.
Ehon koanek, Ahi hesani min ir.
Losilkatien vasi keil hel en hen.
Ihise en ‘More Meatin Tatie Sise en,’
‘Ahi ten Keihoen,’ ‘Ahi Tamer koa mul lisenges,’
ka ‘Hetetamen ten Tomat.’

- 7 Losilkatien onen hemai hekeih imok.
Anatin, en hen, meatin keil vasi ito en tomat lisenges.
Losilkatien onen hesuval losilkatien onen asuv houlu Deved mulamu.^e
Kei hetondan en vulin ten keihoen onen
ka helei revi usite onen meatin keil ka houmoni hemal en keil.
Ka losilkatien onen hel lisenges
hetokol keite ten out netan.

^d 7:14 Mat 1:23 ^e 9:7 Luk 1:32-33

Iahova, asuv houlu ten out nesa, en vati mok voumon koanek
veni envatien onen min ir marite mok.”

**Iahova hesan asuv houlu tai houmon meatin keil
onen ito en tomat lisenges**

Aesea 11:1-10

- 11** ¹Iahova selus ka en provet Aesea vit,
“Kosa, losilkatien koa ka en vatiamal onen asuv houlu Deved mai
rokol keite teni
suval vatiai tai koa ara lati.
Ka avaseini, asuv houlu hau tai hekistal rani,
hesuval silite mul vitechiteh ran vatte.^f
- ²Ninin Votut onen Iahova hesieni
ka hesan meteisauen ka ileilien mini.
Hekatauni vailea en sise koa mal
ka hesan keihoen mini keke voum eni.
Ninin Votut koanek hesakini heilea revi Iahova
ka hehouhou mini.
- ³Asuv houlu enek hesi kei mok
vahouhou min Ahi ka helong kati.
En avong ten kot, kei houmoni hemal en meatin keil.
Hermusiltei asas koa kei lesi mal en meten,
vuo asas koa longe en ralingen.
- ⁴Vuo. Navong heles usite onen meatin keil en out netan, houmoni
housil sakien ten maluen enges.^g
Anatin, houmoni hemal en koakeil tounah one tovuol ka hekataun
koakeil arkeihtei.
Ral min selusien onen, helei rahit en usite onen meatin vasi keil ten
out netan.
Anatin, hetal min selusien takeih onen, heta koteh moulien onen
koakeil amum kalkali.
- ⁵Vatte ten losilkatien onen
hehi maluen ka anatinien.^h
- ⁶En hen, tounah vasi keil koa amoul en out netan ito en tomat.ⁱ
Huli rendan keil ito out hetas en tomat hetal min titi sipsip keil.
Taegar keil emun imatil out hetas hetal min nani keil koa avi
havivi.
Ka laeon keil ito hetal min titan buluk keil koa ave musising ka
irkantei keil,
ka keil imah revi keke titiali keil enges akilea avalamun keil.

^f 11:1 Rev 5:5; 22:16 ^g 11:4 2Tes 2:8 ^h 11:5 Efes 6:14 ⁱ 11:6 Aes 65:25

- 7 Buluk keil ianian ruai hetal min **bear** keil,
 ka titae keil imatil ruai en tomat.
 Ka laeon keil ian oumunai
 hesuval buluk keil.
- 8 Titali keil koa akea veah
 ilea ipilei vesesal en out koa tetal tisa keil amul ien.
 Anatin, keil itokol tetal keil,
 ka tounah sakras vamai vapurun keil.
- 9 En out vasi keil koa mul rahat Hou Saeon koa vi vatihou votut onen
 Ahi,
 tounah tovuol hel ien koa kilea vapurun etai meatin vuo voun
 vatisa.
 Ka ileilien usil Iahova hemai hesien revi out netan,^j
 hesuval atas mul sien revi vulin.
- 10 Avong hemai keke asuv houlu hau tai koa hekistal en vatiamal onen
 Deved hemai helomal.
 Meatin keil vasi ten out netan koa amul soutin iha ilesi ka usili.^k
 Anatin, keil imai veni en out kati onen
 koa hehi moreite vis hehi moreite mok.”

Iahova san selusien ten enmahisien min meatin keil onen

Aesea 40:1-5,10-11,18-31

- 40** ¹ Ahi viteni min Aesea vit,
 “Kiha ven meatin keil onak,
 ka kihati lat rendemien keil one.
- ² Kiha kiselus min meatin keil onak ten out **Serusalem** hetal min
 envatien,
 ka kihitehiteni min keil keke sua keil one ten mahien vus tuai.
 Anatin, kihiteni min keil keke mahien koa nasani min keil vinvin
 tuai ven tisaen keil one.”
- ³ Evus, keil itaengon rea tai hehiso hekeih hehit,
 “En out volvol, mihesak revi sise onen Iahova.^l
 Anatin, en out mes, mihoum motein sise onen Ahi orer.
- ⁴ Mihetahin revi poal vasi keil,
 ka vatihou keil vasi, miheil lati hehi aet.
 Out keil koa vurvuru, mihoumoni hehi aet revi,
 ka mihetahin vasi vulvul keil.
- ⁵ Hevus, Iahova hetie lat muohien ten keihoen onen
 ka meatin keil vasi ilesi en avong hetas.

j 11:9 Hab 2:14 k 11:10 Rom 15:12 l 40:3 Mat 3:3; Mak 1:3; Luk 3:4-6; Sion 1:23

Tounah vasi keil enek hekistal hehi anatin
veni Iahova varei vat kati.”

10 ?Milesi? Iahova ten Keihoen varei mul mai suval meatin tavaeen tai
koa mulin vativieh keil onen tuai.

Kei losil kat out vasi ral min mari keihoen onen.

Mul mai ral min ui umen onen ten vaen koa vi tounah keil koa lah
lati ran vativieh keil onen.

Anatin, kei mai ris ral min meatin keil onen koa kulat keil ran
hen vativieh keil onen.^m

11 Kei hetounat revi en meatin keil onenⁿ

hesuval meatin ten sipsip mul rounat en sipsip keil osen.

Anatin, Iahova houmoni min meatin keil onen,

hesuval meatin koa mul vous titi sipsip keil osen ka kav kat revi
mul en veimasan.

Anatin, Ahi hesuval meatin tai koa ring meraun sipsip keil osen
koa titae keil mul.

18 ?Kami mimundemi keke Ahi suval asa?^o

?Asa varei suvali?

19 ?Mukave? ?Kei suval nana koa meatin enges musahi,

ka amosan eni en tounah tetahos keil suval gol ka silva? !Vuo!

20 Ka munak mani ten vati ahi koanek keih ramat,

meatin kilea valei kat ai tai koa keih koa sakras vamande.

Hevus, kei helei kat meatin koa vi meteisau

vasah etai nana koa kilea vahatimal revi ka sakras vamot.

?Iahova suval vati ahi koanek? !Vuo!

21 ?Kami mireingeingeni?

?Mirlongtei asa koa kistal en avong mulamu?

?Mirlongtei veah isei mumon out netan?

Iahova varei mumoni.

22 Kei mul rondan en vulin ten keihoen

nesa mok mulin out netan.

Mul les meatin keil ten out netan avi heisavos suval titin keil.

Ahi mumon out netan ka leh teilang kav koe.

Anatin, leh teilang suval tavolin keke meatin keil avato ien.

23 Ral min keihoen onen, Ahi kilea vou tan en avat keil koa amundemi
keil akur keihoen

ka hesakin keil imai ihi heisav enges.

- 24 Avat keil enek asuval titi holeai keil koa avi heite hau,
koa ason rohtoh en lite ka amoul havivis.
Evus, Iahova mai ven keil suval eang sisil tai,
ka sakin keil amaleles ka amukou,
muh lat keil, ka avupuol.
- 25 Ahi koa vi votut imok visi vit, “?Inau nasuval asa?
?Isei komal milvinvin?”
- 26 Mihelele hehina nesa en teilang.
?Isei mumon hitu keil vasi koa milesi?
Hitu keil enek asuval meatin keil tavaeen
koa Iahova mul mulamun keil amemea ka vise retai en keil en eis
kati one.
Veni keihoen onen marite,
tovuol en keil vavuol.
- 27 ?Kami, me-Isrel keil, vensa miselus kutut kat Iahova
ka mivit kei reingeingen sakvisien keil onami?
?Vensa mimundemi mivit Ahi en rovattei vailea
keke kami milong mahien en hen meatin sav keil?
- 28 ?Mukave? ?Mireingeingeni veah,
vuo mirlong usiltei veah?
Iahova vi Ahi koa mul lises ka lisenges,
ka kei varei mumon out netan.
Aven sakras vamemerau
ka meatin tovuol vailea vasin rendemien keil onen veni mariso ramat.
- 29 Kei varei mul san keihoen
min koakeil ave memerau ka arkeihte.
- 30 Litetai hau keil ka atouli hau keil,
avong tei, ave hememerau ka isavoi navong keihoen one mul vus.
- 31 Ka min koakeil aling desien one en Iahova ven kataunien,
kei hesan ris keihoen min keil.
Tounah vasi keil koa amumoni ral min keihoen koa hesani min keil
hemaes
hesuval veivakum koa mul muka maes en teilang nesa.
Anatin, meatin keil enek ual heha vio ... ka ave hermembrautei.
Keil akilea iloh heha vio ... ave hermahte.

Meatin toumien onen Iahova

Aesea 42:1-7; 49:5-6

42 ¹ Provet Aesea vit mesein selusien onen Iahova vit,
“Ekek, meatin toumien onak koa nasan keihoen mini.

- Kei varei narie lati, ka nasi nau veni.^p
 Nasieni en Ninin onak,
 ka helosil kat revī out vasi keil en sakien ten maluen.
- 2 Kei hervitei meatin koa heselus hekeih,
 ka en sise keil, hermakultei en selusien onen.
- 3 Ven enmahisien onen, hermumontei hekeih
 en koakeil mesav keil amumoni keih en keil.
 Ka koakeil demkatien one rokeihitei mun,
 kei hesuv kat demkatien one.
 Navong helei revī en usite onen meatin keil,
 houmoni hemal min keil vasi.
- 4 Hehati mal hekeih ka rendemien onen sakras vamot
 heha hetokol avong keke houmon sakien ten maluen hekarahit out
 vasi netan.
 Anatin, meatin keil koa aro soutin amul arosin hihiseien keil onen.”
- 5 Evus, provet Aesea vit risi vit,
 “Koanek selusien onen Iahova koa vi Ahi.
 ‘Inau namumon teilang koa karahit out netan.
 Inau namum revī out vasi keil ten out netan ral min tounah vasi
 keil koa amoul ien.’^q
 Inau nasan eang ten moulien koa meatin keil amuseh eni.
 Ka inau naling ninin mul en meatin keil koa amul amual en out
 netan.
- 6 Ral min maluen onak, inau, Iahova, navisok kum minau,
 ka nihuli kat hem ka nikataunuk.
 Nikur koek ka numon **hatkatien takeih** hetal min meatin keil heka
 enuk.
 Nisakinuk kimai kihi laet tai koa hesil en sise ven meatin keil ten
 kantri sav keil.’^r
- 7 Keik kisakin koakeil avi metovar imai ilele,
 ka koakeil aro en out koa malikelik en eim takeih, kumon keil
 imaluv rani.’ ”
- 49** ⁵ Meatin toumien onen Iahova viteni vit,
 “Mulamu, navong arvasitei nau mau,
 Iahova rie lat nau tuai keke mahi meatin toumien onen.
 Anatin, rie lat nau malah ris me-Isrel keil
 koa amul soutin rani.
 Iahova vati lat inau,

^p 42:1 Mat 3:17; 17:5; Mak 1:11; Luk 3:22; 9:35 ^q 42:5 Umen 17:24-25 ^r 42:6 Aes 49:6;
 Luk 2:32; Umen 13:47; 26:23

ka keihoen onak ka veni.”

- ⁶ Iahova viteni minau vit,
 “Keik kovi meatin toumien onak
 ka kumon tounah keil koa hemariso mok.
 Anatin, kilah ris me-Isrel keil koa aka rasil ka amoul veah,
 keil imai ris ito en atan kati one.
 Ka koa hetetamen imok, nisakinuk kimai kihi laet tai^s
 koa hetitin revi heha en kantri vasi keil,
 keke meatin vasi keil ilea suk keke sise ten mututien onen Ahi mai
 rokol meatin vasi keil ten out netan.”

Meatin toumien onen Iahova vi meatin ten longkatien

Aesea 50:4-9

- 50** ⁴ Meatin toumien onen Iahova viteni vit,
 “Iahova ten Keihoen san ileilien minau keke mahisein meatin sav
 keil eni,
 ka masan selusien ten kataunien min koakeil alehkao.
 En visokon vasi, Ahi sisil en nau
 keke nitaengon revi asa koa vit vahiseinau eni.
⁵ Iahova sakinau namundem kilea selusien onen.
 Narseseintei ka narvilestei eisiluk vaha rani.
⁶ Navong meatin keil e vati avatah nau en viau ven umen koa keik
 kosani minau,
 namaen eisiluk min keil amutahi.
 Navong keil aleh lat hiluk ten veimasok ka amutiv kat veinak,
 narling suaintei veinak ran keil.
 Ka navong keil aselus karen nau,
 naro raeng enges.^t
⁷ Tounah keil amumoni va kat inau
 sakras voumonau mamemou
 veni nakilea keke Iahova ten Keihoen mul kataunau.
 Sakini nasak meseinau makur tounah koa keil umoni minau
 veni nakilea asakras avasakinau mamemou.
⁸ Keil asakras veni Ahi ro vesesal venau,
 ka kei hetie lati min keil keke moulien onak muto en meten.
 ?Isei en vati vason selusien tatisa vaha kat nau?^u
 Tahos lovaha en kot lovahatimal ruai keke avatalimal en ialu.
 En out enek, kei hehit visi asa koa mundemi namumoni tisa eni.

^s 49:6 Aes 42:6; Luk 2:32; Umen 13:47; 26:23 ^t 50:6 Mat 26:67; Mak 14:65

^u 50:8 Rom 8:33-34

9 Iahova ten Keihoen varei heselus en usite onak.
 ?Sakini, isei kilea vaselus vatasa vaha kat inau?
 Keil akilea avaselus heha vio ... ivupuol enges.”

Iahova hehati lat meatin toumien onen koa kur mahien

Aesea 52:13-15; 53:1-12

52 ¹³ Iahova selus ka en provet Aesea vit,
 “?Kami milesi? Meatin toumien onak houx hetal min
 meteisauen,
 ka houx vasi tounah koa nalingi en hen.
 Ven sakien enek, nihati lati ka nisan houhouen mini.
 Anatin, nisan more eis ten hetetamenien mini.
¹⁴ Navong amuti katiat nan ka amutahi aven,
 amumoni va vio ... alesi suval rovitei mun meatin.
 Sakini, meatin keil houlu amutimanin eni navong alesi.
¹⁵ Ka navong iles hetetamenien onen,
 meatin keil houlu ten out netan itimanin eris eni,
 ka asuv houlu keil e hehon.
 Veni keil ilei kilea en asa koa arlong usiltei veah,
 ka indem kilea suk tounah keil areingeingeni veah mulamu.”^v

53 ¹ Navong meatin keil iles asa koa hekistal en meatin toumien
 onen Iahova, keil ihitani min keil eris ihit,
 “?Munak meatin tai vit usil longlongien enek mulamu,
 isei hekur anatin eni?”
 ?Isei kilea valei kilea hen Iahova
 en sakien keil koa kistal ekek?
² Vi rendemien onen Iahova enges
 keke meatin toumien onen hemoul
 hesuval liai koa vitech en atan tames.
 Tounah tovuol en veinan vuo en aven
 koa vasakin meatin keil avandem usili vuo avousili.
 Anatin, tounah tovuol vareni eni
 koa valeh meten meatin keil.
³ Meatin keil amundem maeni ka aseini.
 Kei vi meatin koa kilea revu sakvisien keil ka mahien keil emun.
 Kei vi meatin koa meatin sav keil amundem heisav eni
 ka e rovattei availea kei.

⁴ “Anatin eli, kei lah lat mesaian keil orer,

^v 52:15 Rom 15:21 ^w 53:1 Sion 12:38; Rom 10:16

- ka kur mahien keil orer en aven.^x
 Ir romundemi keke Ahi varei san sakvisien ka mahien keil mini.
 Anatin, romundemi keke amutah purun aven ven tisaen onen enges.
- 5 Ka asal vini ven tisaen keil orer.^y
 Anatin, amuti kareni ven sakien tisa keil koa ir enges romumoni.
 Amutah puruni keke ir rokilea rovato en tomat vatal min Ahi.
 Ka out koa lovlovu en aven, sakin aver maluv ran mesaien keil.
- 6 Ir vasi rosuval sipsip keil koa alei ras sise one ka avuol.^z
 Anatin, ir vasi romusil retai en sise keil orer.
 Ka mahien koa mal keke Ahi hesani min ir ven tisaen keil orer,
 kei sani suk min meatin toumien onen.
- 7 “Avaseini meatin keil amum tisa houlu va kati,
 rendemien onen mules netan, ro raeng enges.
 Kei suval titi **sipsip** tai koa amulamuni vaha avouasi vamat,^a
 roviten etai selusien.
 Anatin, romumontei verien
 suval sipsip tai navong asoui lin hilin.
- 8 Navong ales usite onen en kot, armumontei vama eni.
 Keil amulamuni va vamat, ka meatin keil amundem heisav eni enges.
 Asan rendemien keke moulien onen vavus ran out netan,
 ven tisaen keil orer.
- 9 Avaseini e vati avatahin teiai onen vesesal ven koakeil amum tisa,
 navong mat, arahini en out koa arahin koakeil tounah one houlu amul ien.
 Keil avit umoni mini mukonek,
 avaseini kei romumontei rea vuo roluvostei meatin sav keil.”^b
- 10 Ka en Aesea, Iahova selus eris usil meatin toumien onen vit,
 “Inau etin, namumon rendemien onak
 keke kei hekur mahien hesuval amuti kokoa.
 Inau nisakin moulien onen hemai hehi sanien votut tai
 koa voutut moulien onen meatin keil.
 Ka katau, hemoul eris ran matien ka heles titan keil.^c
 Anatin, hemoul heto hetaveah ka heles koakeil emun ikistal ika en keil.
 Ka en meatin toumien onak,

^x 53:4 Mat 8:17 ^y 53:5 1Pit 2:24 ^z 53:6 1Pit 2:25 ^a 53:7 Umen 8:32-33; Rev 5:6

^b 53:9 1Pit 2:22 ^c 53:10 Sion 1:12; Rom 8:14; Kal 4:6; Efes 1:5

rendemien keil koa naling kati hemai hekur heite.

11 Katau en mahien onen, kei heles ris sien en moulien onen.

Kei heilea suk keke rokur heisav entei mahien onen.

Meatin toumien onak, moulien onen mal revi

ka houmon moulien onen meatin keil houlu hemai hemal en metok.

Helah lat tisaen keil one ran keil

keke num ris methos onak hetal min keil.

12 Hesakini, inau nisan eis ten hetetamenien mini

ka hetondan hetal min hetetamen sav keil ka hetal min koakeil akur keihoen.

Numoni hemukonek veni kei mae koteh moulien onen vamat,

ka maen kei enges keke avasak puruni vatal min meatin tisa keil.^d

Ka kei lah lat tisaen keil ran meatin keil houlu,

ka vis Ahi voumon ris methos onen min keil.”

Iahova rie lat enmahisien min meatin keil onen

Aesea 55:1-3,6-11

55

¹ Iahova selus min meatin keil onen ka en provet Aesea vit,

“!Ei, kami vasi koa maroro kat kami,

oai keiek, mihemai mihemuni!^e

Ka kami koa **mani** onami tovuol,

almai alhul anien ranau ka miheani.

Anatin, almai venau ka alhul uaen ka melik,

veni inau nisa maeni min kami suval sanien enges.

2 ?Vensa mivul tounah en mani onami

koa sakras vakataun moulien onami?

?Vensa mimum keih

keke mivahul anien koa sakras val vataveah?

Mihetaeng revi enau ka mihoumon asa koa mahiteni.

Hemukonek, en tinomi, mihesi kami ven anien koa tahos vis

tahos imok koa nisani min kami.

3 Meatin keil onak, mihelong nau ka mihemai venau.

Mihemai venau, ka mihelei kat moulien koa vi anatin.

Inau numon **hatkatien takeih** hetal min kami koa hel lisenges,

ka nitie lat envatien onak min kami musil asa koa navat kati min

asuv houlu **Deved** mulamu.”^f

⁶ Aesea viteni min meatin keil vit,

“Kosa, mihehiles mihelei kat Iahova navong maen kami mivahotini.

^d 53:12 Mak 15:28; Luk 22:37 ^e 55:1 Rev 21:6; 22:17 ^f 55:3 Umen 13:34

- Mihehiso heha veni navong mul vesesal ven kami.
- 7 Kami, meatin tisa keil, mihelokovein sakien tatisa keil onami ka rendemien keil koa romaltei.
Anatin, kami mihehiles moulien onami ka mihemai vesesal ven Iahova.
Hemukonek, enmahisien onen hel en kami ka houmon ris methos hetal min kami.
Anatin, kei hermundemtei mun tisaen keil onami vareii.”
- 8 Evus, Iahova viteni mun min meatin keil onen ka en provet Aesea vit,
“Rendemien onak rosualtei rendemien keil onami,
ka sakien onak teisav ran sakien keil onami.
- 9 Anatin, rendemien ka sakien keil onak
vina nesa mok mulin rendemien ka sakien keil onami.
Keil amul nesa mok suval koa teilang mul nesa mok mulin out keil vasi en out netan.
- 10 Navong ous motmot ran teilang vakas out netan,
mum vasi umen onen.
Mul sakin tounah vasi keil koa aluhi en atan mouli
ka san heite ka aneite min meatin keil avaani.^g
- 11 En vati sakien enek, selusien onak koa va min meatin keil,
sakras vahi heisav enges.
Navong nasan selusien tai eva,
selusien koanek houm vasi tounah keil koa naling kati tuai voumoni.”

Provet Aesea selus keih meatin keil onen Iahova ven tisaen keil one
Aesea 59:1-4

- 59** ¹Provet Aesea sel kat meatin keil vit,
“Kami minandemtei minahit Iahova rokurtei keihoen voutut moulien onami.
Ka minandemtei mun minahit ralingen vonhon keke rolongtei uaien onami ven kataunien. !Romukteinek vareii!
- ² Tisaen keil onamis mul riti vas kami miva soutin ran Ahi onami.
Anatin, tisaen keil enges onami sakin Ahi viles eisilin min kami ka sakin kei rolongtei mun hisien keil onami.
- ³ Sakien keil onami vilehilu en tisaen
ka hemi vi amus ral min ran meatin sav keil koa mimuasi mat.
Hilingomi vilelau en luvosien
ka mimul miselus en tounah koa romaltei.

^g 55:10 2Kor 9:10

4 En out koa amumon kot ien
 mirmusiltei sise koa vama.
 Ka navong mimulomal keke mivaselus en usite onami,
 miluvos ka miselus en tounah koa rovitei anatin keke mivaleh
 rendemien onen meatin sav keil.
 Kami miling kat sise keke mivapurun meatin sav keil eni,
 evus, mimusili.”

Aesea vit lat tisaen keil onen me-Isrel keil min Iahova

Aesea 59:9-10,12-17,20

- 9 Provet Aesea vit lat tisaen en usite onen meatin keil vit,
 “Ahi rolestei mun usite keil orer
 ka maluen onen rorokoltei mun out koa roro ien.
 Komai merosin meneai vakistal en moulien onomai,
 ka meles mankoli enges.
- 10 Sakini meretavel suval meatin koa meten var.
 Anatin, memusavoi en taviai enges suval out vong.
 Avaseini mesav keil ave keih,
 keihoen tovuol en ir suval memat tuai.”
- 12 Sakini, meatin keil avitehit lat keil min Iahova avit,
 “O Iahova, sakien tatisa keil onomai koa memumoni va katuk avi
 houlu ramat.
 Tisaen keil onomai amul amuas ris komai.
 Anatin, komai mekilea keil vasi,
 ka melonge tisa houlu ven keil.
- 13 O Iahova li, komai mevae va katuk,
 ka memun mevit mereingeingenuk vare.
 Meseseinuk
 ka mermusiltei mun keik koa kovi Ahi onomai.
 Lisenges, meselus usil sise koa mevapurun meatin sav keil eni,
 ka mukave komai mehemea mehelokovein hem.
 Luvosien keil amul akistal sase enges ran rendemien onomai,
 sakini selusien taluvosien mul kistal ran ongomai lises.
- 14 Navong meles revi usite onen meatin keil, mermusiltei mun more
 sakien keil,
 ka sakien ten maluen tovuol en komai.
 Selusien ten anatinien tovuol luhu en meatin keil onomai,
 ka merkurtei mun anatin en selusien onen meatin sav keil veni
 komai vasi meluvos.
- 15 Ka veni anatinien tovuol emun en komai,

koakeil e vati avalokovein saki en tisa keil one,
alesi keke meatin sav keil amea apurun keil.”

Sakini, provet Aesea viteni vit,

“Sakien tatisa vasi keil onen meatin keil,
Iahova lei kilea eni ka rositai veni,
veni kei lesi keke maluen tovuol en keil.

16 Kei longe tisa navong lele ka lesi keke
meatin tovuol vakataun meatin sav keil.^h

Sakini kei vit voutut moulien one
en keihoen ka maluen onen enges.

17 Sakini, musin en kei suval meatin tavaeen tai.ⁱ

Musin en maluen suval tounah koa mul koe veimasen,
ka ling saki en ten mututien suval tounah koa kur koe vatin.
Kei hemai hesa kesi min meatin keil usil saki en tisa keil koa
amumoni,
ka hetie lat vurohien onen min koakeil amum kalkali.

20 “Inau, Iahova, nimai en out Serusalem ka nutut moulien onen
meatin keil koa amul ien.^j

Anatin, nimai nikur koe me-Isrel keil koa aviles ran tisaen keil
one.”

Iahova houtut moulien onen me-Isrel keil

Aesea 61:1-3

61 ¹ Koanek selusien onen meatin toumien onen Iahova,
“Ninin Votut onen Iahova ten Keihoen mai sienau,
veni rie lat nau mahitehiten more longlongien min koakeil tounah
one tovuol.^k

Kei sila nau masakin koakeil tine mah, ilonge hetahos eris.
Anatin, sila nau mahiteni min koakeil amul en hen mesav keil keke
imaluv iha,
ka min koakeil amul en mankoli ten eim takeih, keil akilea
avasital rani avaha ris teim.

2 Kei sila nau mahitehiteni keke Iahova rie lat avong koanek
keke kei vatie lat kataunien onen min meatin keil onen,
ka vou lin koakeil amum tisa.

Kei sila nau numai mahati lat rendemien
onen koakeil amurang.^l

^h 59:16 Mat 9:36 ⁱ 59:17 Efes 6:14,17; 1Tes 5:8 ^j 59:20 Rom 11:26 ^k 61:1 Mat 11:5;
Luk 4:18-19; 7:22 ^l 61:2 Mat 5:4

³ Numai masakin koakeil amurang en Hou **Saeon** avakur ris keihoen.
 Anatin, koakeil arangis meatin tai, nihati lat rendemien one.
 Nihiles tangien one hemai hehi souen keil ten masmasien.
 Ka keil ilomal hekeih en sakien ten maluen
 hesuval vatiai tetaveah keil koa Iahova varei luhi.
 En sakien enek, moulien one hetie lat
 muohien ka hetetamenien onen Ahi.”

Meatin keil avis ven enmahisien ka kataunien onen Ahi

Aesea 64:4-9

64 ⁴Provet Aesea vis min Iahova vit,
 “O Iahova, meatin tovuol veah valesuk en meten,
 vuo vakur longlongien usil ahi sav tai koa suvaluk.
 Veni keik varei komumon marmari tounah
 vakataun koakeil aling desien one enuk.^m

⁵ Keik kokur rev i koakeil e vati avoumon asa koa mal,
 koakeil amundem kat mengkatien keil onom ka amusili.
 Ka min komai, kosel kat komai,
 ka memules memumon tisaen keil.
 Anatin, avaseini kovuroh kat komai houlu,
 en avong onen avu onomai keil mai rokol kosa, komai memules
 memum romaltei.
 Mervinvintei kovoutut moulien onomai.

⁶ Komai vasi mermutotei en metom.
 Anatin, avaseini mesak visi mevoumon sakien keil koa
 memundemi mevit mal,
 en metom, sakien keil enek atisaso vilehil.
 Ven tisaen keil onomai, moulien onomai suval ouai koa maleles ka
 merangle, ka vuol navong eang muh rasilini vaha.

⁷ Tovuol en komai vahis minuk.
 Meatin tovuol emun en vati vailea keik.
 Ven tisaen keil onomai, keik koling suainuk ran komai
 ka komaen komai mekan heite ten tisaen keil onomai.

⁸ Ka keik, Iahova, kovi Tata onomai.
 En hem, komai mesuval tanhili koa keik komumoni mai vi pot.
 Anatin, komai mevi heite ten umen onom.

⁹ Sakini, konavul kattei komai li.
 O Iahova li, konandemtei mun usil tisaen keil onomai.
 Kitie lat enmahisien onom min komai li
 veni mevi meatin keil onom.”

^m 64:4 1Kor 2:9